


Жаңа технология – сапалы білім негізі

Қоғамда болып жатқан жедел де қарқынды өзгерістер білім беруге қойылатын талаптарды жаңа бағытта түбегейлі өзгертуде. Әлемдік білім беру кеңістігінде жеке тұлға мен қоғамның қажеттілігін қанағаттандыратын көп деңгейлі үздіксіз білім беру қалыптасуда. Қазіргі білім концепциясының басты мақсаты – өзінің және қоғамның мүддесіне өзін-өзі белсенді етуге дайын, күнделікті бәсекеге қабілетті және шығармашыл, білімді тұлғаны дамыту және қалыптастыру. Қоғамдағы өзекті мәселелердің бірі – өзгермелі әлеуметтік және экономикалық жағдайда өмір сүруге ғана емес, болып жатқан өзгерістерге қатысып, оны жақсартуға ықылас етіп, белсенді, әлеуметтік жауапкершілігі жоғары, ой-өрісі кең, сауатты, танымдық әрекетке қызығуы мол оқушы тәрбиелеу.



Бұл үрдіс, ең алдымен, жаңа мазмұнмен және уақыт талабына сәйкестікте толықтырылған білім беруді ұйымдастырумен байланысты. Елімізде білім беру мазмұны стандарттары мен сабақтан тыс қызмет бағдарламаларының іске асырылуын қамтамасыз ету үшін мектепке дейінгі, бастауыш, негізгі орта, жалпы орта, техникалық және кәсіптік білім беру ұйымдарының материалдық-техникалық базасын жаңарту және нығайту бойынша жұмыс жүргізілуде.

Материалдық база дегеніміз – бұл білім беру ұйымдарындағы оқыту мен тәрбие берудеңгейін анықтайтын негізгі факторлардың бірі. Ол мектеп кабинеттерінің жабдықталуын, олардың нормативтерге сәйкестігін бағалауды көздейді. Әр типке қатысты оқу сыныптарының, бөлмелердің, оқу-өндірістік шеберханалардың нормалары мен ережелері, сонымен олардағы гигиеналық жағдайларға қатысты талаптар енген санитарлық-эпидемиологиялық ережелер сақталуы тиіс.

Аудан орталығындағы Ө.Бөкейхан атындағы тірек мектебінде, С.Ибраев атындағы негізгі орта мектебінде, К.Байсейітова атындағы тірек мектебінің технология кабинеті қыз балалар және ұл балалар үшін қажетті заманауи жабдықтармен қамтамасыз етілді. Жаңа оқу жылында ерекше жабдықталған кабинетке жаңа жиһаздармен қоса сапалы LEGEND 2520 тігін машиналары, 1 оверлок «JANOME тігін «DAPINA» қысқа толқынды пеш, холодильник, «Зығыр», «Түкті мата», «Қалың мата мен жібек мата» демонстрациялық үлгілер, манекен, «Синтетикалық және жасанды талшықтардан жасалған маталарды өндіру кестелері» сатып алынды. Ас бөлмеге қажетті ыдыс-аяқтар, жабдықтар, жаңа жиһаздар алынды. Сынып бұрыштарына технология кабинетінің қауіпсіздік ережелері жазылған стенділер мен санитарлық бұрышқа арналған жабдықтар келді.

Аудандық білім бөлімінің қолдауымен жаңа технология кабинетінің жабдықталуы сапалы білім алуға жасалған зор мүмкіндік екені сөзсіз. Пән мұғалімдері ұлттық қолөнеріміз бен сәнді киім тігуді үйретіп қана қоймай, қыз балаларға ас мәзірін дайындау, әртүрлі тамақ дайындап үйренуге де мүмкіндік жасалғанына ерекше қуанышты.

«Халық пен халықты, адам мен адамды теңестіретін – білім». Қорыта айтқанда, Президент Қасым-Жомарт Тоқаевтың Қазақстан халқына жолдаған Жолдауының басты бағытының бірі – осы білім саласы. Рухани-мәдени саламыздың нығаюына, адами қасиеттердің жоғарылауына, жеке адамның сапалық ерекшелігінің өрлеуіне білімнің ғана құдіреті жететіні күннен-күнге айқындалып келеді.

Қ.Қабдыкаримова,
ауданның білім бөлімінің әдіскері.